

TE MANA O TE TAIAO

AOTEAROA NEW ZEALAND
BIODIVERSITY STRATEGY 2020

WHAKARĀPOPOTO



Ina raru ana te taiao, kei te raru hoki tātou

Kei te tino raru a Papatūānuku rātou ko Ranginui, ko ā rātou uri, ā, me kōhukihuki te whakapakari i tā tātou manaaki i a rātou. Ko te āhua o te taiao tētahi whakarereka ka waihotia ake e tātou ki ngā reanga whakaheke.

He nui ngā ara e whai painga ai ō tātou oranga me tō tātou pāpori mai i te taiao. E whakawhirinaki ana ki te taiao ēnei mea katoa, te hau me te wai mā, te kai ka whakatipuria, ka haongia, ka ararua e tātou, me tō tātou ohaoha pūtaka-tāpoi, -ahumatua hoki. Kua tūhonotia tātou ki te taiao mā ō tātou tini ahurea, mā ngā wāhi e noho nei tātou, ngā wāhi e whakapau wā ana tātou, ā, he wāhanga te taiao o tō tātou tuakiri.

He mea waiwai te rerenga rauropi taurikura ki te taiao taurikura. Mā te whai taiao e haumako ana te rerenga rauropi e pai ake te tuku a te ao tūroa i ngā whaipāinga e whirinaki ana tātou. He ahurei ki te ao te taiao ki Aotearoa, ā, he tukunga whakahirahira tōna ki te rerenga rauropi ā-ao - kei te whakamanatia ā-ao tātou hei 'tino pūwāhi' mō te rerenga rauropi.

He kawenga manaaki tā tātou hei whakarite e hauora ana, e taurikura ana ngā kararehe, ngā tipu, ngā hekaheka, ngā moroiti ahurei e kitea ana ki tō tātou whenua, ā, kia tautinei hoki te whakamahi i ngā rawa māori.

Heoi anō, kei te raru te taiao ki Aotearoa. Kei te mimiti haere te rerenga rauropi kei mua i te aroaro o ngā pēhanga pērā i ngā momo urutomo, ngā whakamahinga whenua, moana hoki, te whakapau tōtika i ngā momo, te panoni āhuarangi, me te parahanga. Kei te hanga, kei te whakakaha hoki ngā pēhanga tītaha ki aua pēhanga tōtika. Kei roto i ēnei ko te kore whai pūnaha tika ā-kaupapa here, ā-ture, ā-ārahitanga, me te tokoiti o ngā tāngata whai mātauranga, rauemi hoki hei mahi i te mahi, te momotu hoki o te hononga o te tangata ki te taiao.

Rerenga rauropi, te rerenga rauropi koiora rānei, ko te tikanga o tēnei ko te taurangi i waenganui i ngā rauropi mai i ngā pūtaka katoa, kei roto nei ko ngā pūnaha hauropi ā-whenua, ā-moana, ā-wai māori hoki, tae atu hoki ki ngā taiao matatini hauropi e noho rā rātou; kei roto i tēnei ko te rerenga i roto tonu i ngā momo, i waenganui i ngā momo, i ngā pūnaha hauropi anō hoki.

Ina taurikura te taiao, ka taurikura hoki tātou

He aha ka taea e tātou hei āwhina i te taiao?

Ki konei ki Aotearoa kei te angitu kē tā tātou mahi ki te tiaki, ki te whakahaumanu i te taiao. He āheinga ināiane he haumi tonu atu anō ki tō tātou angitu, me te kaha whakatū i te taiao ki te ngako o ngā mea katoa e mahi ana tātou, mā korā e whai hua mō te taiao, mō ō tātou oranga anō hoki. Kei te whakatakotoria e Te Mana o te Taiao – Aotearoa New Zealand Biodiversity Strategy (Aotearoa New Zealand Biodiversity Strategy, ā muri ake nei ka tuhia hei ANZBS) ka pēhea tā tātou hanga ki runga i te tūāpapa kua hangaia kētia e tātou, me te whakawhānui ake hoki, kia taurikura tō tātou taiao, me ōna tāngata.

Ka haere a Aotearoa ki te huarahi, tātou ko te ao katoa, ki te haumanutanga ā-ohaoha, ā-pāpori hei ngā tini tau kei te heke mai whai muri i te mōrearea Kowheori-19. Ka noho pūtaka ki te haumanutanga angitu te whakamana i te noho ngako o te taiao ki tō tātou ohaoha, ki te āhua o tā tātou whakahaere pakihi.

Ka whakamāramatia Te Mana o te Taiao – ANZBS

Kei te whakatakotoria e Te Mana o te Taiao – ANZBS tētahi aronga rautaki mō te tiaki, te whakahaumanu, me te whakamahi toitū i te rerenga rauropi taketake ki Aotearoa.

Kei te whakatakotoria e Te Mana o te Taiao – ANZBS te aronga rautaki whānui mō te rerenga rauropi ki Aotearoa mō te 30 tau kei te heke mai. He tata tana tūhonohono ki te mahi rerenga rauropi ā-rohe, ā-takiwā, ā, kei te ārahi hoki ia i taua mahi.

Kei te whakatakoto hoki Te Mana o te Taiao – ANZBS i te aronga rautaki mō ngā rāngai, mō ngā rōpū hei whakatinana motuhaketia. Hei tauira, ka taea e tētahi rangatōpū ahumahi te whakahāngai i tā rātou rautaki taiao, rerenga rauropi rānei ki Te Mana o te Taiao – ANZBS, ā, ka taea hoki e ngā rōpū hapori te whakamahi i Te Mana o te Taiao – ANZBS me tā rātou rautaki ā-takiwā hoki hei ārahi i ā rātou mahi.

Mō tātou katoa e noho ana ki Aotearoa Te Mana o te Taiao – ANZBS hei pupuri, hei whakatinana. He wāhi mā tēnā, mā tēnā o tātou ki te whai wāhi mai, ahakoa te rahi, te iti rānei o tāna mahi. Mā te mahi ngātahi ki ngā whāinga ngātahi, ka nui ake ngā āhuetanga ka pahawa i a tātou, i tā te takitahi.

E hira ana kia mārama kei te tuku Te Mana o te Taiao – ANZBS i te wāhi kotahi hei aronga mō tātou, engari ka rerekē ō tātou ara kia tae atu ki reira. He rerekē ngā take o te ngaronga rerenga rauropi mai i tētahi wāhi ki tētahi atu, e ai ki te taiao māori me te āhua o te whakahaere, te whakamahi hoki i ngā rawa māori. Ka hiahiatia ngā rongoā rerekē e ai ki te āhuetanga, te wāhi, te horopaki hoki. Ahakoa kei te tautoko ā tātou mahi katoa hei Aotearoa i te wawata kotahi, i ngā putanga ōrite, he rerekē pea te āhua o te whakatutuki i tēnei ki ngā wāhi, ki ngā takiwā rerekē – ā, koinei tētahi o ngā āhuetanga pūtake kia angitu ai tātou.

Biodiversity in Aotearoa te pūrongo āpiti

Hei whakaahei kia tiakina, kia whakahaumanutia te rerenga rauropi me ngā taonga ahurei o te whenua nei, he mea nui kia māramatia ngā āhuetanga kei runga i a rātou, ngā ia e rere ana, ngā tini pēhanga e arohia ana, ā, ko te katoa o ēnei ka whakamōhiotia atu e ngā tirohanga, e ngā hitori, e ngā tirohanga ā-ao whakahāngai o te mātauranga Māori, o te pūtaiao anō hoki. Kei te tukuna e te pūrongo āpiti ki Te Mana o te Taiao – ANZBS, arā *Biodiversity in Aotearoa*, te tūāpapa taunakitanga mō Te Mana o te Taiao – ANZBS mā te whakarāpopoto i te āhuetanga o nāiane, ngā ia me ngā pēhanga ki ō Aotearoa tipu, kararehe, pūnaha hauropi hoki ki te whenua, ki te wai māori, ki te moana.

Te Mana o te Taiao - Aotearoa New Zealand's Biodiversity Strategy 2020

Te wawata

Te Mauri Hikahika o te Taiao

Kia ngotongoto, kia uekaha te mauri o te taiao

Ngā take e hira ai tēnei

E whirinaki ana ngā āhuatanga katoa o tō tātou oranga, ā-tinana, ā-ahurea, ā-pāpori, ā-oahaoha, ki te taiao me ngā ratonga e tukuna ana e te taiao. Kei te noho te oranga o te taiao hei tūāpapa o tō tātou oranga, o tātou āhua noho, ngā mea kia ora ai anō hoki. E whai uara ana te taiao mō tōna ake āhua (uara rāroto), ā, e tūhonotia ana ki tō tātou tuakiri hei hunga nō Aotearoa. Ko tō tātou wawata mō te wā e heke mai ana me te taiao kei reira te mauri taurikura, ngotongoto, uekaha hoki ka whakaputa i te oranga taurikura mō te hunga nō Aotearoa.

Te raru

Kei tētahi aituā rerenga rauropi tātou - kei te tino raru a Papatūānuku rātou ko Ranginui, ko ā rātou uri, ā, me kōhukihuki te whakapakari i tā tātou manaaki i a rātou. Kei te mimiti haere te taiao māori ki Aotearoa, ā, puta noa i te ao, ā, kei te noho mōrearea tōtika i ngā pēhanga, tae atu ki ngā panoni ki ngā whakamahinga whenua, wai māori, moana hoki, ngā momo rāwaho, te whakapau mā te kai, mā ngā rawa, te parahanga, me te whakatuma piki haere o te panoni āhuarangi. Ko ngā pēhanga tītaha, pērā i te kore tū mai o ngā 'pūnaha' tika, ko te kore rawaka o te mātauranga, o ngā rauemi rānei a te tangata ki te mahi, ko te momotu o te tangata ki te taiao, e hanga ana, e whakapakari ana i aua pēhanga tōtika. Ki konei ki Aotearoa kei te angitu kē tā tātou mahi ki te tiaki, ki te whakahaumanu i te taiao, ā, kei te whakatakatoria e tēnei rautaki ka pēhea tātou e whakawhānui ai, e hanga ai ki runga i te tūāpapa kaha kua hangaia kētia e tātou kia tukuna ai tō tātou ao tūroa, me ōna tāngata, kia taurikura ai.

Tā tātou e whai ana ki te whakatutuki hei te tau 2050

Putanga 1

Kei te taurikura ngā pūnaha hauropi, mai i ngā tihi o ngā maunga ki ngā rētōtanga o te moana

- E taurikura ana te mauri o ngā pūnaha hauropi
- Kei te tiakina te whānuitanga o ngā pūnaha hauropi taketake, ā, kei te haumarutia mō ngā reanga whakaheke
- Kua pupurutia, kua whakahaumanutia hoki/rānei te hauora, te toitū, te tūhonohono hoki o ngā pūnaha hauropi, tae atu ki ngā wāhi e muia ana e te tangata

Putanga 2

Kei te taurikura ngā momo taketake me ō rātou nōhanga puta noa i Aotearoa, i tua atu anō hoki

- Kua whakahaumanutia te mana o ngā momo taonga
- Kua tiakina, kua haumarutia hoki te katoa o ngā momo taketake, ā, karekau ērā e whakaraerae ana ki te korehāhā i runga i ngā mahi ā-tangata
- Ko ngā taupori momo e hauora ana, e kanorau ā-ira ana, ā, ka aumangea ake rātou ki ngā whakatuma o te wā e heke mai ana, tae atu ki te panoni āhuarangi
- Ko ngā momo hekeheke me ō rātou nōhanga kua haumarutia whakawhiti atu i ngā aukati o whenua kē

Putanga 3

Kua whakahōhonotia ngā oranga o te tangata mā tō rātou hononga ki te taiao

- Kei te tūhonotia te hunga katoa ki Aotearoa ki te taiao, ā, kei te tautoko, kei te tautoko hohe i tōna tiakitanga, i tōna whakahaumanutanga
- Ko te hononga ki te taiao e whakapakari ana i te hauora ā-tinana, ā-wairua, ā-hinengaro o te tangata me te kounga o te noho
- Ka riro i ngā reanga whakaheke he taiao kua whakahaumanutia, e taurikura ana

Putanga 4

Kei te whakatinanatia e ngā hoa Tiriti, e ngā whānau, e ngā hapū, e ngā iwi te katoa o tā rātou mahi hei rangatira, hei kaitiaki anō hoki

- Kei te whakaheke te rerenga rauropi aumangea i ngā tikanga ahurea, mahinga kai hoki, mā reira e tautoko i te whakahaumanutanga o te mātauranga Māori
- Ka hikina te mana e te taiao kua whakahaumanutia
- Kei te ngako o te pūnaha rerenga rauropi ngā hoa Tiriti, ngā whānau, ngā hapū, ngā iwi, ngā whakahaere Māori anō hoki, ā, kei te whakamanatia hei kaiārahi

Putanga 5

He hononga kore wewete te taurikura ki te rerenga rauropi taurikura

- Kei te tuku te rerenga rauropi taurikura i ngā ratonga e noho pūtaka ana ki tō tātou taurikura
- Kei te whakahaeretia toitūtia ngā rawa rerenga rauropi hei tuku i ngā whaipanga ohaoha haere tonu
- He pānga tapatahi, whaipanga rānei tō te mahi ohaoha ki te rerenga rauropi
- He mahi pū tā te rerenga rauropi taurikura ki tō tātou aronga ki te whakamauru i te panoni āhuarangi

Ko te ngako o ā tātou mahi mai i tēnei wā tae atu ki te tau 2050 ko ngā pou e toru e whakaatu ana i te aronga me te arotahinga hei ārahi i a tātou ki te panoni nui whakaharahara e hiahiaitia ana hei whakatutuki i ngā putanga o te rautaki.

TŪĀPAPA Kia tika ai te pūnaha

Me noho mai ngā pūnaha tika hei huripoki i te mōrearea rerenga rauropi. Kei te whakatakoto ēnei whāinga paetawhiti whakapae me pēhea tēnei e whakaritea ai.

Ō tātou whāinga paetawhiti mō te tau 2050:

1. Kua whakatūria ngā pūnaha 'ā-mana whakahaere, ā-ture, ā-pūtea, ā, e whakaheke ana ēnei i te tukunga o ngā putanga rautaki
2. He rangatira, he kaitiaki hoki ngā hoa Tiriti, ngā whānau, ngā hapū, ngā iwi, ngā whakahaere Māori
3. Kei te ngako o te mahi ohaoha te tiakitanga rerenga rauropi
4. Kei te whakamōhiotia ā tātou mahi e ngā pūnaha pai ake mō te mātauranga, te pūtaiao, te raraunga, me te auahatanga hoki
5. He wāhanga tino pūtaka te mātauranga Māori o te rangahau me te whakahaere rerenga rauropi
6. He whaitake te tautoko a Aotearoa i te rerenga rauropi ā-ao

WHAKAHAU Te whakamana i te mahi

Kei te hiahia tātou kia āwhina mai te hunga katoa nō Aotearoa hei whakahaumanu i tō tātou rerenga rauropi. Kei te whakatakoto ēnei whāinga paetawhiti whakapae me pēhea tātou e whakarite ai ka whakamanatia te katoa ki te mahi.

Ō tātou whāinga paetawhiti mō te tau 2050:

7. Kei te hunga katoa nō Aotearoa ngā pūkenga, te mātauranga, te āheinga kia pai te mahi
8. Kei te whakaheke ngā rauemi, te tautoko hoki i ngā tāngata tiaki o te taiao e tūhono ana, e hohe ana
9. Kei te tuku putanga pai ake te mahi ngātahi, te hoahoa ngātahi, me te ngātahitanga

TIAKI ME TE WHAKAHAUMANU Te whakahaumanu me te whakaora

Me whakakore tātou i ngā pēhanga tōtika e hanga ana i te mimitanga ki te rerenga rauropi, te whakarite kia toitū te whakamahinga rerenga rauropi, me te whakahaumanu i te rerenga rauropi ki ngā wāhi kua ngaro. Kei te whakatakoto ēnei whāinga paetawhiti i ngā mahi ka oti i a tātou hei whakarite kia aumangea, kia haumarutia te rerenga rauropi.

Ō tātou whāinga paetawhiti mō te tau 2050:

10. Kei te tiakina, kei te whakahaumanutia, kei te aumangea, kei te tūhonotia ngā pūnaha hauropi me ngā momo mai i ngā tihi o ngā maunga ki ngā rētōtanga o te moana
11. Kei te whakaritea e te mahi whakahaere kia whakaheke ngā mōrearea koirora me ngā pēhanga mā te whakahaere
12. Kei te whakahaeretia tautineitia ngā rawa māori
13. Kei te tuku te rerenga rauropi i ngā rongoā pūtaka-taiao ki te panoni āhuarangi, ā, kei te noho aumangea ki ōna pānga

Whakatinananga

Kei ia o ngā whāinga paetawhiti (objectives) he whāinga (goals) ka taea te ine, e herea ana ki te wā. Kei te whakaritea ngā whāinga mō te tau 2025 mō Tūāpapa me Whakahaere, ā, ki 2025, 2030 me 2050 mō Tiaki me te Whakahaumanu. Mā ngā whāinga whakapae ki ēnei kaupapa whakaarotau tuatahi e rua, tātou e whakaheke ki te whakatutuki i ngā whāinga wā roa e whakamāramatia ana ki Tiaki me te whakahaumanu. Ka whakaritea e te whakamahere whakatinana he mahi kia whakatutuki ai ngā whāinga mō te wā tata nei. Ka aromātaitia te kokenga whakamua ki ngā mahi me ngā whāinga, ā, ka arotakengia, ka whakahoungia ngā mahi me ngā whāinga hei whakarite kei te huarahi tika tātou ki te whakatutuki i ngā putanga.

Te ine i te angitu:

Ka aromātaitia auautia te kokenga whakamua ki ngā putanga rautaki. Ka arotahi te pūrongo kokenga whakamua ki te tukunga o ngā mahi whakatinana (te aroturuki whakaputanga), me te kokenga whakamua ki ngā putanga (te aroturuki putanga). Ka tū tētahi arotake kokenga whakamua ia 5 tau, ā, ka whāia tēnei e tētahi arotake, whakahou hoki i te rautaki me te whakawhanaketanga o te mahere whakatinana 5-tau whai muri. Ka whakawhanaketia tētahi huinga tohu hei ine i te kokenga whakamua hei wāhanga o te wā tuatahi o te whakatinananga. Kei te tukuna tētahi ripanga o ngā tohu marohi mō ngā putanga e rima ki Āpitianga 4.

Ka pēhea tātou e mahi ngātahi ai:

He mahi mā tēnā, mā tēnā ki te tiaki me te whakahaumanu i te mauri o te taiao. Kei te rautaki tētahi huinga uara, mātāpono pūtaka hei ārahi i te āhua o tā tātou mahi ngātahi hei hanga whakatahi, hei tuku i ngā mahi. Ka noho ēnei hei tūāpapa mō te whakamahere whakatinana.

He Awa Whiria te aronga

Kei te kōrero He Awa Whiria mō ngā awa whiriwhiri, kua hangaia ki ngā tini korou wai e kōtuituia ana. Ko te rahi, ko te āhua o tētahi awa whiria e rerekē haere ana i ngā wā katoa i te nekehanga o ngā korou, me te rapunga o te wai ki ngā ara hou.

Ka taea te whakaaro ki ia whiri o te awa hei tirohanga ā-ao, hei uara, hei tirohanga ahurei rānei. Ka whakaatu hoki ngā whiri awa i ngā mahi a ngā tāngata, a ngā rōpū, a ngā rāngai rerekē ki te tiakitanga me te whakahaumanutanga i te rerenga rauropi.

Kei te tīaho He Awa Whiria ki ngā wāhi e whiriwhiri ai te awa – hei tauira, te tūhono i te mātauranga Māori ki ērā atu pūnaha mātauranga pūtaiao, ki ērā atu āhua o te mārama ki te ao hei tautoko i ngā mahi, i ngā auahatanga kia hua mai te rerenga rauropi taurikura.

Mā tātou tēnei aronga e whakamahi kia whakatinana, kia noho mārama ki Te Mana o te Taiao – ANZBS hei ara ki te whakauru mai i te katoa o ngā mātauranga, iwi hoki ki Aotearoa, i te wā tonu e whakarite ana kia whakamanatia te ngātahitanga Tiriti, ā, kia whakatairangahia te mātauranga Māori kia tū ōrite ai ki ērā atu momo o te mātau.

Ka pēhea tātou e mahi ngātahi ai hei whakatutuki i Te Mana o te Taiao – ANZBS

Me whai wāhi mai te katoa ki ngā mahi whakatika i te ngaronga rerenga rauropi i te pūnaha rerenga rauropi – ngā whānau, ngā hapū, ngā iwi, ngā whakahaere Māori, ngā whakahaere ā-taiao ehara i te kāwanatanga (NGO), te kāwanatanga ā-motu, ā-takiwā hoki, ngā pakihī, te ahumahi, me ia tangata takitahi. Ko te tikanga o tēnei ka mahi te tangata ki te taha o ērā atu hei whakahaere hohe i ngā whakatumā ki te taiao, me te whakamahi i ngā mahi pai, hihiko anō hoki hei tiaki, hei whakahaumanu i te taiao.

Ka hiahiatia tētahi whānuitanga taputapu hei whakatutuki i te rautaki, tae atu ki ngā pūnaha mō te reretahi, te whakahaerenga me te tuku pūtea, te ture me ērā atu taputapu ā-ture, te tautoko me ngā whakapoapoa.

He wāhanga waiwai o Te Mana o te Taiao – ANZBS te tautīnei i ngā mātāpono o te Tiriti o Waitangi. Mā te mahi tahi i runga i te ngātahitanga ki te wawata kotahi mō te taiao e whakaritea kia whakahaumarutia hohetia ngā haepapa rangatira, kaitiaki hoki, tae atu hoki ki te mātauranga Māori.

Ko te rerenga rauropi tētahi wāhanga anake o te taiao, ā, he nui ngā take o te ngaronga rerenga rauropi, he whiwhiwhi hoki. He nui ngā wāhanga mahi e hāngai ana tētahi ki tētahi ki ngā kaupapa o te haumarua koiora, te whakamahere tāone, te whakaputanga ahumahi, te whakamahere panoni āhuarangi, te pūngao me ngā awa, te mātauranga, arā noa atu. Ka whakaahei Te Mana o te Taiao – ANZBS i ngā hononga me te mahinga ngātahitanga puta noa i ēnei kaupapa.

Ka pēhea te whakatinana i Te Mana o te Taiao – ANZBS

Ko te whakarewatanga o Te Mana o te Taiao – ANZBS te pae tuatahi noa iho kia whakatutukihia he āhua pai ake ki te mahi ngātahi hei manaaki i te taiao. Ka hiahiatia te whānuitanga o ngā tirohanga me ngā pūkenga hei whakamahere, hei whakatinana i ngā pae whai muri, kei roto i ēnei ko ngā iwi, ngā hapū, ngā whānau, ko te kāwanatanga ā-motu, ā-rohe, ko te ahumahi, ko te pūtaiao, ko ngā NGO, ko ngā hapori anō hoki.

Hei tāpiri atu ki te whakatakoto i tētahi tūmanako, i tētahi aronga, me whakatakoto hoki e tētahi rautaki tētahi ara mō te āhua o tā tātou whakatutuki i ngā whāinga, i ngā whāinga paetawhiti, ā, mā wai ēnei e mahi. Ināianei kua whakatūria Te Mana o te Taiao – ANZBS, ko te wāhanga whai muri o te whakawhanaketanga rautaki ko te whakahoahoa ngātahi i tētahi mahere whakatinana mō ngā tau 2021 - 2022.



Kei te kitea anake he awa whiria ki ētahi wāhi ruarua ki te ao. Ki Aotearoa nei kei te tuku nōhanga rātou mō ngā tini momo taketake. *Whakaahua: Dave Murray*

Hui tahi, ko Te Mana o te Taiao – ANZBS me te mahere whakatinana ka noho hei te Rautaki Rerenga Rauropi o Aotearoa (Aotearoa New Zealand Biodiversity Strategy).

Ka arotahi te mahere whakatinana tuatahi ki te whakatū i ngā pūnaha, i ngā hātepe e hiahiatia ana ki te tautoko i te tukunga pai o Te Mana o te Taiao – ANZBS, waihoki kia koke whakamua ngā mahi ka taea te tīmata ināianei. Ka tū te mahi whakamahere whakatinana i te hurihanga 5-tau atu i te tau 2025 mō te roanga atu o te wā o te rautaki.

Ka aromātaitia auautia, ka pūrongotia tūmatanuitia hoki te kokenga whakamua e hāngai ana ki te rautaki me te mahere whakatinana. Mā ngā arotake auau e whakarite ka noho hou, hāngai, whakaaweawe tonu te rautaki, ā, kei te inea, kei te noho haepapa tātou mō tō tātou kokenga whakamua.

Me whakatinana Te Mana o te Taiao – ANZBS ki ngā taumata ā-motu, ā-takiwā, ā-rohe hoki. E herea ana ētahi mahi kia whakatinana ā-motutia – ka tino arahina ēnei e ngā pokapū, e ngā whakahaere ā-motu rānei. He maha te whakatinanatanga ā-takiwā, ā-rohe ka arahina mā ngā rautaki ā-takiwā, ā, ka whakatinanatia e rātou e mōhio pai rawa ana ki tō rātou takiwā – arā, ko ngā kaunihera, ngā iwi, ngā hapū, ngā kaupupuri whenua, kaiwhakamahi whenua, ngā hapori, me ngā tāngata kei te whenua tonu i aua rohe.

Kia āhei atu ki te puka rautaki katoa o Te Mana o te Taiao – ANZBS, toro atu ki www.doc.govt.nz/anzbs-strategy

I arahina te whakawhanaketanga o Te Mana o te Taiao – ANZBS e Te Papa Atawhai mō Aotearoa. I hangaia i runga i ngā kupu tohutohu, i ngā whakaaro o ngā hoa Tiriti, ngā whānau, ngā hapū, ngā iwi me ngā whakahaere Māori, ngā hapori, ngā tāngata takitahi, te hunga whai pānga, ngā NGO, ngā rōpū ahumahi, me te kāwanatanga ā-motu, ā-rohe anō hoki – arā, ko rātou ka noho waiwai ki tana angitu.

Te Mana o te Taiao – Aotearoa New Zealand Biodiversity Strategy 2020 Whakarāpopoto

UHI: He rākau kauri tino rahi (ko Tāne Mahuta), e tūramatia ana e te tangata whai rama. *Whakaahua: Rob Suisted*

Te Papa Atawhai
Pouaka Poutāpeta 10420,
Te Whanganui-a-Tara 6143,
Aotearoa

Here-turi-kōkā 2020

Te ētita me te hoahoa:
Te Rōpū Ratonga Auaha, Te Papa Atawhai

Nā Melanie Nelson i whakamāori.
Ko Ian Cormack te kanohi hōmiromiro.



Kua raihanatia tēnei mahi ki raro i te raihana Creative Commons Attribution 4.0 International. Ko te ngako, e wātea ana koe ki te tārua, te tuku, te whakarerekē rānei i te mahi, mēnā ka tohua te mahi ki te Karauna, mēnā hoki ka whai koe i ērā atu ture raihana. Hei tiro ki tētahi tāruatanga o tēnei raihana, <https://creativecommons.org/licenses/by/4.0/>.

